



Republika e Kosovës
Republika Kosova-Republic of Kosovo
Qeveria
Vlada-Government
Ministria e Zhvillimit Ekonomik
Ministarstvo Ekonomskog Razvoja-Ministry of Economic Development

**UDHËZIM ADMINISTRATIV NR. 01/2011 PËR RREGULLAT DHE PROCEDURAT E MBLEDHJES TË
RENTËS MINERARE**

REPUBLIKA E KOSOVËS
QEVERIA
MINISTRIA E ZHVILLIMIT EKONOMIK

Në mbështetje të nenit 93 (4) të Kushtetutës së Republikës së Kosovës, nenit 4 (3) të Rregullores së Punës të Qeverisë së Kosovës, nenit 8 paragrafi 1.4 të Rregullores Nr. 02/2011 për Fushat e Përgjegjësisë Administrative të Zyrës së Kryeministrit dhe Ministrive, si dhe me qëllim të zbatimit të nenit 50 të Ligjit Nr. 03/L -163 për Minierat dhe Mineralet,

Ministri i Ministrisë së Zhvillimit Ekonomik,

Nxjerr këtë:

UDHËZIM ADMINISTRATIV
NR. 01/2011 PËR RREGULLAT DHE PROCEDURAT E MBLEDHJES TË RENTËS MINERARE

Neni 1
Qëllimi dhe Fushëveprimi

1. Qëllimi i këtij udhëzimi administrativ është përcaktimi i rregullave dhe procedurave të mbledhjes së Rentës Minerare nga Komisioni i Pavarur për Miniera dhe Minerale, për Buxhetin e Republikës së Kosovës, në pajtim me Ligjin Nr. 03/L -163 për Minierat dhe Mineralet.
2. Ky udhëzim Administrativ zbatohet për të gjithë ata që merren me shfrytëzimin e lëndëve të para minerale në Republikën e Kosovës.

Neni 2
Përkufizimet

1. Shprehjet që përdoren në këtë Udhëzim Administrativ kanë domethënien si në vijim:
 - 1.1 **Ministria**, nënkupton Ministrinë e Republikës së Kosovës përgjegjëse për Sektorin Minerar;
 - 1.2 **KPMM**, nënkupton Komisionin e Pavarur për Miniera dhe Minerale;
 - 1.3 **Renta Minerare**, nënkupton shumën që duhet paguar Shtetit (Buxhetit të Republikës së Kosovës) si kompensim për shfrytëzimin e resurseve që nuk përtëriten;
 - 1.4 **S** – nënkupton Sasinë e mineralit të shfrytëzuar;
 - 1.5 **Ç** – nënkupton çmimi fiks sipas listës së Rentës Minerare;
 - 1.6 **R_m** –nënkupton Rentën Minerare të pagueshme;
 - 1.7 **T_{sl}** –nënkupton Totalin e sasisë së larguar nga miniera;
 - 1.8 **(%)M_c** –nënkupton Përqindjen (%) e mineralit të caktuar;
 - 1.9 **Ç_{tb}** – nënkupton çmimin shitës në tregun botëror;
 - 1.10 **(%)L_{Rm}** –nënkupton përqindjen e caktuar në listën e Rentës Minerare.

Neni 3
Lista e Rentës Minerare

1. Renta Minerare paguhet në pajtim me listën për Rentë, të aprovuar nga Kuvendi i Kosovës në pajtim me Ligjin Nr. 03/L -163 për Minierat dhe Mineralet.
2. Mineralet metalore dhe jometalore të përpunuara në vend kanë zbritje të Rentës:
 - 2.1 Si koncentrat 10% në vlerën e Rentës Minerare;
 - 2.2 Produktet e përfituara pas procesimit metalurgjik 20% në vlerën e Rentës Minerare.
3. KPMM është organi përgjegjës për vlerësimin dhe arkëtimin e Rentës Minerare në pajtim me listën e aprovuar.

Neni 4
Pagesa e Rentës Minerare

Renta Minerare paguhet për aktivitetet minerare në pajtim me Ligjin Nr. 03/L -163 për Minierat dhe Mineralet.

Neni 5
Kriteri i pagesave të Rentës Minerare

1. Identifikimi i Rentës Minerare duhet të bëhet duke marrë parasysh kriteret në vazhdim:
 - 1.1 Aktivitetet e shfrytëzimit të mineraleve në pajtim me dispozitat e Ligjit Nr. 03/L -163 për Minierat dhe Mineralet;
 - 1.2 Periudha e shfrytëzimit në pajtim me dispozitat e Ligjit Nr. 03/L -163 për Minierat dhe Mineralet;
 - 1.3 Lloji i mineralit është i shfrytëzuar në pajtim me Grupimin sipas listës së mineraleve për Rentën Minerare.
 - 1.4 Llogaritja e pagesës së Rentës Minerare bëhet në përputhje me Listën e mineraleve për Rentë të aprovuar nga Kuvendi i Republikës së Kosovës. Deri në hyrjen në fuqi të listës së Rentës Minerare të aprovuar nga Kuvendi, do të mbetet në fuqi lista paraprake e shpallur në mënyrë të ligjshme.

Neni 6
Përcaktimi i Sasisë dhe Përmbajtjes

1. Pagesat e Rentës Minerare duhet të bazohen në raportet zyrtare të Operuesve të Shfrytëzimit sipas nenit 34 paragrafi 4.2.1, 4.2.2 dhe 4.2.3 të Ligjit Nr. 03/L -163 për Minierat dhe Mineralet, dhe këto raporte mbi sasinë e lëndës së shfrytëzuar mund të verifikohen nga KPMM.
2. Sasia e shfrytëzuar e lëndës minerale që kalkulohet në m³ (metër kub) sipas listës së mineraleve për Rentë Minerare nënkupton sasinë e mineralit në gjendje natyrore-në vend (të dhënat merren nga projekti i shfrytëzimit).
3. Sasia e shfrytëzuar e lëndës minerale që kalkulohet në t (ton) sipas listës së mineraleve për Rentë Minerare nënkupton sasinë e mineralit që del nga miniera.

4. Për rastet kur kompania minerare përfundon aktivitetin e shfrytëzimit në minierë, ose ndërpret aktivitetin e saj është e obliguar ta paraqesë raportin dhe ta bëjë barazimin e gjendjes fizike dhe financiare me KPMM-në.
5. Kompanitë që bëjnë shfrytëzim të lëndëve minerale metalore, industriale, energjetike janë të obliguara që në raport të përfshijnë edhe përmbajtjen në përqindje të komponentëve të dobishme, kimike, apo vlerës termike, varësisht nga lloji i grupit mineral në raport me periudhën kohore.
6. KPMM, mund të bëjë verifikimin e sasisë së shfrytëzuar dhe analizave laboratorike, ose të kërkojë nga kompania që t'i kryejë analizat në një laborator neutral.
7. Ndryshimi në rezultatin e analizave korigjuese është i lejueshëm deri në +/- 5%, në përqindjen e mineralit.
8. Nëse ky ndryshim është më i madh atëherë si të sakta për kalkulim do të merren analizat nga laboratorit neutral i caktuar nga KPMM.
9. Pala e pakënaqur ka të drejtë ankese në Gjykatën kompetente.

Neni 7 Raportimi

1. Pagesat e Rentës Minerare duhet të paguhen në afatin 30 ditor pas çdo periudhe të raportimit në pajtim me Ligjin Nr. 03/L -163 për Minierat dhe Mineralet .
2. Personi i pajisur me licencë duhet të sjell brenda tridhjetë (30) ditësh nga fundi i secilit tremujor kalendarik raportin për shfrytëzimin (m^3/t) të mineralit/eve të nxjerra nga vendburimi gjatë atij tremujori si dhe të dhënat sipas nenit 34.4 të Ligjit Nr. 03/L -163 për Minierat dhe Mineralet, një deklaratë që paraqet shumën e Rentës Minerare të përcaktuar për pagesë përkitazi me atë tremujor, dëshminë me shkrim se Renta Minerare e tillë është paguar në mënyrën dhe shumën e raportuar.
3. Pronarët e kompanisë janë të obliguar që të mbajnë libra apo shënime të veçanta financiare për pagesat dhe sasinë e shfrytëzuar, ndaras nga librat e Administratës Tatimore të Republikës së Kosovës.
4. Formulari Standard për raportim për vendburime të veçanta përgatitet nga KPMM me të gjitha detajet e nevojshme për raportim.
5. Në rast të shtimit apo largimit të ndonjë komponenti (minerali, metali) në listën minerale të shfrytëzueshme, KPMM i përshtatë formularin rrethanave të reja.

Neni 8 Vlerësimi i Rentës Minerare

1. Në rast se KPMM dyshon në saktësinë e raportuar-paguar apo rastet kur kompania nuk ka raportuar fare, apo nuk janë paraqitur siç është paraparë në Ligjin Nr. 03/L -163 për Minierat dhe Mineralet, përgatitë vendim për Renta Minerare në vlerësime, bazuar në informacionin në vijim:
 - 1.1 Raportet e Minimit;
 - 1.2 Vlerësimet e Inspektoratit;
 - 1.3 Raportet nga gjeodetët e pavarur;

- 1.4 Raport i gjeodetëve të KPMM;
- 1.5 Raportet nga llogaritjet e nxjerra nga fotografimi ajror;
- 1.6 Planifikimet e kompanisë të dorëzuara në KPMM;
- 1.7 Raporte tjera që KPMM i konsideron të nevojshëm.

Neni 9

Kalkulimi i Rentës Minerare

1. Kalkulimi i Rentës Minerare bëhet në pajtim me listën e Rentës Minerare të aprovuara nga Kuvendi i Republikës së Kosovës, ndërsa në rastet ku kërkohet çmimi shitës për kalkulim të Rentës Minerare, në mungesë të informatave faktike të çmimit shitës, kalkulimi i Rentës Minerare do të bëhet në pajtim me të dhënat nga Kursi i Metaleve të Londrës (London Metal Exchange) dhe valutën në fuqi në Republikën e Kosovës.
2. Te mineralet ndërtimore, jometalore apo për mineralet që Renta Minerare është fikse, kalkulimi bëhet sipas formulës $R_m = S \times \text{Ç}$ (Sasia e mineralit të shfrytëzuar x çmimi fiks sipas listës së Rentës Minerare = Renta Minerare e pagueshme).
3. Çmimorja përcaktohet me referencë në Mjetet Kesh të Çmimeve Mesatare Mujore siç është publikuar nga Kursi i Metaleve të Londrës (London Metal Exchange), dhe llogaritet duke marrë mesataren e çmimeve të 3 muajve të tremujorit kalendarik përkatës.
4. Në rastet kur nuk ka çmime shitëse të përcaktuara në LME, te mineralet do të caktohet Renta Minerare fikse dhe kalkulimi i Rentës Minerare do të bëhet sipas listës së aprovuar nga Kuvendi i Republikës së Kosovës.
5. Te mineralet metalore dhe mineralet e tjera që Renta Minerare është e caktuar në përqindje, kalkulimi do të bëhet sipas formulës $R_m = T_{sl} \times (\%)M_c \times \text{Ç}_{tb} \times (\%)L_{Rm}$ (Totali i sasisë së larguar nga miniera x përqindja e mineralit të caktuar x çmimi shitës në tregun botëror x përqindja e caktuar në listën e Rentës Minerare = Renta Minerare e pagueshme).
6. Kalkulimi i Rentës Minerare është i veçantë dhe nuk ka të bëjë me taksa tjera, asnjë shpenzim apo humbje teknologjike nuk merret parasysh me rastin e caktimit të Rentës Minerare.

Neni 10

Deklarimi dhe Pagesa e Rentës Minerare

1. Kompanitë obligohen të raportojnë për vëllimin e mineraleve të nxjerra gjatë tremujorit, të deklarojnë dhe paguajnë Rentën Minerare për sasinë e raportuar në pajtim me këtë Udhëzim Administrativ në afatin prej 30 ditësh pas përfundimit të tremujorit kalendarik, p.sh. për tetor-nëntor-dhjetor të vitit aktual, afati është deri me 30.01. të vitit vijues. Nëse afati i fundit bie në ditën kur është ditë pushimi, ose festë zyrtare, afati i fundit do të jetë në ditën tjetër të punës.
2. Deklarimi do të konsiderohet si një vlerësim i bërë nga vetë kompania.
3. Në fund të çdo viti bëhet barazimi në mes të sasisë së shfrytëzuar dhe pagesave të Rentës Minerare. Çdo ndryshim duhet të barazohet në periudhën (tremujorin) e parë të vitit vijues.

Neni 11
Procedurat me rastin e mospagesës së Rentës Minerare

1. Nëse bartësi i licencës nuk e paguan Rentën Minerare në afat, KPMM-ja do të nxjerrë një "Njoftim për Dështim" në përputhje me dispozitat e Ligjit Nr. 03/L -163 për Minierat dhe Mineralet dhe do t'i ndërmarrë masat e parapara me këtë ligj.

2. KPMM, mund të lëshojë urdhër me shkrim, me anë të të cilit ndalohet bartësi i Licencës që të shesë ose tjetërsojë mineralet ose prodhimet në fjalë, përderisa të gjitha Rentat Minerare të jenë paguar ose përderisa të arrihet deri te një marrëveshje të pranueshme për KPMM-në për pagimin e Rentës Minerare.

Neni 12
Ankesat

Procedurat e ankesave dhe shqyrtimi i tyre behet ne pajtim me nenin 84 të Ligjit Nr.03/L-163 për Minierat dhe Mineralet.


Neni 13
Mbetjet minerale metalore

1. Për mbetjet nga mineralet metalore të cilat deponohen si steril, Renta Minerare do të llogaritet me rastin e shfrytëzimit të mëvonshëm.

2. KPMM cakton një komision profesional për vlerësimin e mbetjeve - sterilit.

Neni 14
Hyrja në fuqi

Ky Udhëzim Administrativ hyn në fuqi ditën e nënshkrimit nga Ministri i Ministrisë së Zhvillimit Ekonomik dhe publikohet në Gazetën Zyrtare të Republikës së Kosovës.

Besim Beqaj

Ministër i Zhvillimit Ekonomik